

TUTÚ NÍ CADÚHA TÉ PĀBLŪ QUIHIⁿ NDAHA ÑÁYIU ÑUÚ ÉFESÚ

Té Pāblú cādūha-dé tutú quihiⁿ ndaha ñáyiú xĩndecu ichi Xítóhó Jesucristú ndécú ñuú Éfesú

¹ Yúhú té Pāblú ní tendaha ñàha Yá Ndiõxí càháⁿ-í tnúhu Xítóhó Jesucristú núú ñáyiú, chí ducaⁿ ní cachí Yá Ndiõxí cunduu, te vitna cādúha-í tutú-a cuendá daquixi-í ndaha nchaa nchòhó ñáyiú cùu cuendá Yá Ndiõxí xĩndecu ñuú Éfesú, te diu-ni nchòhó cúú-ndó ñáyiú sàndáá iní ñáhá xì Xítóhó Jesucristú.

² Te xicáⁿ táhù-í núú Dütú Ndiõxí Yaá cúú Tātá-ó, ndihi núú Xítóhó Jesucristú sá ná chĩndee chitúu ñaha-gã xii-ndo, te ducaⁿ ndì nduú-gá ná cádá te ío váha cuu iní-ndó cùndecu-ndo.

Espíritú Yá Ndiõxí chĩndè ñaha-xi xii-o chi ndècu ndihi-o Xítóhó Jesucristú

³ Te cachí-ó sã ío càhnu cuu Yá Ndiõxí Yaá cúú Tātá Xítóhó Jesucristú, te ndéé andiú quide Yá Ndiõxí nchaa sá vãha sá cúú-xí-ó cuendá sá ndécú ndihi-o Espíritú-gá, te ducaⁿ quide-gá chí ndècu ndihi-o Xítóhó Jesucristú. ⁴ Te ndéé cútñahá vátá ngãva-gá ñuyiú ñí cachí Yá Ndiõxí sá nchóó cùu-o ñáyiú cùu cuendá-gá, te ducaⁿ ñí cachí-gá sá cuendá Xítóhó Jesucristú cuendá sá nchóó cùu-o ñáyiú ñá túú tnàhí ná cumání cundecu núú-gã, te ducaⁿ te vá cùndècu cuéchi-o. ⁵ Te Yá Ndiõxí ío

cùu iní ñáhá-gă xii-o nũu xiăⁿ ducaⁿ ñĩ cachí-gá ndéé cútnàhá vátá ngăva-gă ñuyíú sã nchóó ndùu-o déhe-gá. Te sá cuendá nchaa sá cádá Xítóhó Jesucristú sá cúú-xí-ó, xiăⁿ ducaⁿ ñĩ cachí Yă Ndiöxí, te ducaⁿ ñĩ cachí-gá chi ducaⁿ tnàhí ní sani iní-gá cunduu. ⁶ Te xiăⁿ nũu xini ñuhu-xi sá nchóó càchí-ó sã ïo càhnu cuu Yă Ndiöxí, chi ïo cùndahú iní ñáhá-gă chíndèè ñaha-gá xii-o. Te ducaⁿ quide-gá chi ndècu ndihí-o Xítóhó Jesucristú Yaá ïo cùu iní-gá. ⁷ Te Yă Ndiöxí ïo cùu iní ñáhá-gă xii-o nũu xiăⁿ Xítóhó Jesucristú ní satĩ ñĩñí-gă te ní xihí-gá cuendá dacăcu nihnu ñaha-gă xii-o nũú ùhú núú ndàhú, te ducaⁿ càda cahnu iní-gá nchaa yícá cuèchi-o. ⁸ Te Yă Ndiöxí ïo cùndahú iní ñáhá-gă chíndèè ñaha-gá xii-o, nàcuáa ngúndecu ndihí-o nchàa sá ximí tnùnì-ó te ducaⁿ te cuu-o ñăyiu tècú tnùnì. ⁹ Te Yă Ndiöxí ní dánèhé ñáhá-gă xii-o nchàa sá ndúú yùhu, nchaa sá ñĩ sani iní-gá cada-gá. Te ducaⁿ ñĩ quide-gá chi ducaⁿ ñĩ sani iní-gá cunduu. ¹⁰ Te sá ñĩ sani iní-gá cada-gá te dacuití sã cádá-gă ná sàá nduu, te na sàá nduu-áⁿ te mee-gă cada sá Xítóhó Jesucristú quindaha-gă nchaa sá ïo andiú, ndihí nchaa sá ïo ñuyíú-a.

¹¹ Te nchoo ñĩ nduu táhú-ó ñĩ nduu-o ñăyiu cùu cuendá Yă Ndiöxí chi ndècu ndihí-o Xítóhó Jesucristú. Te ducaⁿ ñĩ cuu chi ducaⁿ tnàhí ní sani iní Yă Ndiöxí cunduu. Te nchaandi túhú sá quidé-gă, quide-gá nàcuáa sàni iní mée-gă cunduu. ¹² Te ducaⁿ ñĩ cuu cuendá sá nchũhú ñăyiu díhna nuu ñĩ sándáá iní tnúhu Xítóhó Jesucristú cáháⁿ-ndí sá ïo càhnu cuu mee Yă Ndiöxí cuendá nchaa sá vaha quide-gá. ¹³ Te nchòhó tucu cútnàhá ní xíndedóho-ndo tnũhu ndáá tnúhu sá càháⁿ nàcuáa

naníhí tǎhú-ó ní cuu ñⁿnuu-ndo ndìhi Xítóhó Jesucristú chi ní sándáá iní-ndó-gǎ. Te xǎⁿ cútnùní sá nchòhó ní nduu-ndo ñǎyiu cùu cuendá Yǎ Ndiǒxí, chi ní ngúndecu ndìhi-ndo Espíritú-gá sá ní cachí-gá taxi-gá. ¹⁴Te sá ndécú ndìhi-o Espíritú Yǎ Ndiǒxí xǎⁿ cútnùní sá ndáá nduu tǎhú-ó cùndecu-o ndìhi-gá ná sàá nduu nàcuaca ñaha-gá xii nchaa nchoo ñǎyiu cùu cuendá-gá, te sá dúcáⁿ càda-gá nùu xǎⁿ tàù-ó càchí-ó sǎ ïo càhnu cuu-gá.

Té Pǎblú xìcáⁿ tǎhú-dě núú Yǎ Ndiǒxí cuendá cue ñǎyiu ndècu ichi-gá

¹⁵Te yúhú ñìhí-í tnúhu sá nchòhó ïo váha sándáá iní-ndó Xítóhó Jesucristú, te nchaa ñǎyiu cùu cuendá Yǎ Ndiǒxí ïo cùu iní-ndó-yu. ¹⁶Te xǎⁿ nùu ñá túú dàña ndeé-í ndàcáⁿ tǎhù-í núú-gǎ cuendá-ndó, te ïo xìcáⁿ tǎhù-í ¹⁷núú Yǎ Ndiǒxí Yaá cúú Tǎtá Xítóhó Jesucristú cuendá-ndó. Te diu-ni Yá Ndiǒxí cúú-gǎ Yaá ïo càhnu cuu. Te xìcáⁿ tǎhù-í núú Yǎ Ndiǒxí sá mée-gǎ ná cáda sǎ Espíritú-gá chindee ñaha-xi xii-ndo cuendá cuu-ndo ñǎyiu tècú tnùnì, te na càda-xi sá cútnùní iní-ndó nàcuáa sàni iní Yǎ Ndiǒxí. ¹⁸Te ducaⁿ xìcáⁿ tǎhù-í núú Yǎ Ndiǒxí cuendá-ndó, cuendá sá nchòhó tecú tnùnì-ndó nàcuáa ndùu tnúhu ndee ìní ní taxi-gá ní ngúndecu ndìhi-ndo cùtnàhá ní cáháⁿ ñáhá-gǎ xii-ndo. Te ducaⁿ cùtnunì tucu iní-ndó sǎ ncháá sǎ ní cachí-gá taxi-gá nduu tǎhú nchoo cue ñǎyiu cùu cuendá-gá cúú-xí mèe cuií-ni sá ïo-gá váha. ¹⁹Te cùtnunì tucu iní-ndó sǎ Yǎ Ndiǒxí ïo càhnu cuu-gá quidé-gǎ nchaa núú sǎ váha sá cúú-xí nchòo ñǎyiu sándáá ìní ñáhá xii-gá, chi quide-gá sá vǎ yòo tnàhí ndàcu cada sá cúú-xí-ó dàtná ní quide-gá ²⁰ní dándótó-gǎ Xítóhó Jesucristú cùtnàhá ní xíhí-gá. Te

ní taxinucóo-gá Xítóhó Jesucrístú xio cùha-gá táxí tnùní-gá. ²¹ Te Xítóhó Jesucrístú ío-gá cùnùu-gá dàcúúxí nchàa núú cuè espíritú, ndihi dàcúúxí nchàa cue téé yìndaha ñáyiú, ndihi dàcúúxí nchàa dava-gá cue téé cùnùu. Te cuèi vitna te cuèi ndéé núú cuàháⁿ núú vèxi ducaⁿ-ni ìo cunuu-gã taxi tnùní-gá. ²² Te mee Yã Ndiõxí ní quide-gá sá Xítóhó Jesucrístú taxi tnùní-gá nchaandi túhú sá íó, te ñiú-ni mee Yã Ndiõxí ní cachí-gá sá ncháá ñáyiú cùu cuendá-gá quindaha ñàha Xítóhó Jesucrístú. ²³ Te cada iní-ó sã ncháá ñáyiú cùu cuendá Yã Ndiõxí cúũ-yu yiqui cùñú Xítóhó Jesucrístú, chi ñⁿ-ni cùú-yu ndihi-gá, te mee-gã táxí tnùní-gá nchaandi túhú sá íó.

2

Yá Ndiõxí ío cùndahú iní ñáhá-gã xii-o núu xíãⁿ ní dácãcu nihnu ñaha-gã

¹ Te nchòhó cúú-ndó dàtná ñáyiú ní xíhí cuendá nchaa sá cuèhé sá dúhá quide-ndo ni cuu, dico vitna cada iní-ndó sã dàtná ní ndoto-ndo chi ní nduu táhú-ndó cùndecu-ndo ndihi Yá Ndiõxí ní caa ni quíhíⁿ. ² Te ducaⁿ ñí xíndecu-ndo ìchi cuehé ichi duha, chi ní cáncicúⁿ nihnu-ndo nchàa sá cuèhé sá dúhá íó ñuyíú-a, te ní xóo cada-ndo nchàa nacuáa càháⁿ sácúíhná, te ñiú-ni sácúíhná-ãⁿ táxí tnùní-xi nchaa dava-gá espíritú cùndihi-xi, te ñiú-ni-xi ndècu ndihi-xi nchaa ñáyiú ñá túú cùní tñi tñúhu càháⁿ Yã Ndiõxí, te dàcaháⁿ ñáhá-xí xii-yu cuendá cundecu-ní-yu ichi cuèhé ichi duha. ³ Te nchaa-o dùcaⁿ ní xóo cada-o dàtná quidé cuè ñáyiú-áⁿ, chi ní xóo cada-o nchàa sá cuèhé sá dúhá ñí xóo cani iní-ó, te nándi-gá nchaa sá cuèhé sá

dúhá nǐ xóo cahu iní-ó nǐ xóo cada-o, núu xiǎⁿ tàú-ó sǎ dándòho ñaha Yá Ndiǒxí xii-o ni cùu datná tàú-xi dandòho-gá nchaa ñáyiú ducaⁿ ndècu ichi cuehé ichi duha-án. ⁴ Te Yá Ndiǒxí ío cùu iní ñáhá-gǎ xii-o núu xiǎⁿ ní cundàhú iní ñáhá-gǎ xii-o ⁵ cuèi cùu-o datná ñáyiú ní xíhí sá cuèndá nchaa sá cuèhé sá dúhá quide-o ni cuu. Te ducaⁿ nǐ quide-gá ní cundàhú iní ñáhá-gǎ xii-o cuèndá cundecu-o ndìhi Xítóhó Jesucrìstú vitna, te cuu ìⁿnuu-o ndìhi-gá. Te sá cuèndá-ni sá cùndàhú iní ñáhá Yǎ Ndiǒxí xii-o xiǎⁿ ní quide-gá nàcuáa nchoo nàníhí tàhú-ó. ⁶ Te cada iní-ó sǎ dàtná ní quide Yá Ndiǒxí cùtnàhá ní dándótó-gǎ Xítóhó Jesucrìstú cùtnàhá ní xíhí-gá ducaⁿ nǐ quide ñaha-gǎ xii-o chi ndècu-o ndìhi-gá vitna. Te Xítóhó Jesucrìstú sa ndècu-gá andiú núú ndécú Yǎ Ndiǒxí. Te cada iní-ó sǎ Yá Ndiǒxí sa ní quide-gá sá nchóó nǐ ngúndecu túu-o ndìhi Xítóhó Jesucrìstú, chi ío váha ndècu-o vitna. ⁷ Te Yá Ndiǒxí quidé vǎha ñaha-gǎ xii-o vitna cuèndá sá ná sàá nduu, te diú-ni mee-gǎ cada te cutnùní iní nchaa ñáyiú sá ìo cùu iní ñáhá-gǎ xii-o, te ducaⁿ ìo chindee chitúu ñaha-gǎ xii-o cuèndá sá ndécú ndìhi-o Xítóhó Jesucrìstú. ⁸ Te Yá Ndiǒxí ío cùndahú iní ñáhá-gǎ xii-ndo núu xiǎⁿ ní quide-gá sá nchòhó naníhí tàhú-ndó. Te ducaⁿ nǐ quide-gá chi ní sándáá iní-ndó-gǎ. Te ñá díú sǎ cuèndá ìⁿ chiuⁿ ni quide-ndo ducaⁿ ní nàníhí tàhú-ndó, chi mee Yǎ Ndiǒxí ní cuini-gá sá dicó-ni ducaⁿ nàníhí tàhú-ndó. ⁹ Te mee Yǎ Ndiǒxí ní cachí-gá sá ñà díú cuèndá ìⁿ chiuⁿ quide-o naníhí tàhú-ó, te ducaⁿ nǐ cachí-gá cuèndá sá vǎ cádá càhnu-o mee-o. ¹⁰ Te Yá Ndiǒxí ní quide ñaha-gǎ xii-o dàtná ìⁿ ñáyiú saa

cuèndá sá ñí tnahá tnúhu-o ndìhì Xítóhó Jesucrìstú, te ducaⁿ ñí quide-gá cuèndá sá cádá-ó mèe-ni sá vǎha. Te Yá Ndiǒxí ducaⁿ tnàhí ní sani iní-gá cunduu sá nchóó cùu-o ñáyiu cada mee-ni sǎ vǎha.

Xítóhó Jesucrìstú quidé-gǎ ío váha cùu iní-ó ndècu-o

¹¹ Te nchòhó chí dándàcu iní nàcuáa ní xíndecu-ndo ni cùu, chí ñá túú cùu-ndo ñáyiu isràél, te ni ñà túú quide-ndo datná quidé ñáyiu-áⁿ, chí ñáyiu-áⁿ sǎha-yu señá ñí-yu, te dàquee tíhǔ-yu nchaa ñáyiu ñá túú ndècu señá ñí-xi. ¹² Te chí dándàcu iní nàcuáa ní xíndecu-ndo, chí dàvá-áⁿ ñà túú ní xíndecu-ndo ndìhì Xítóhó Jesucrìstú, te ni ñà túú ní xǒo cuu tnahá tnúhu-ndo ndìhì ñáyiu isràél, te ni ñà túú ní xíní tnùní-ndó nàcuáa ndùu tnúhu sá ñí cáháⁿ ndáá Yá Ndiǒxí nàcuáa cada váha-gá ñáyiu, te ni ñà túú ní cùu-ndo ñáyiu quíndaha-gǎ, te ni ñà túú ní xǒo níhí-ndó tnǔhu ndee ìní sá cùndècu-ndo ndìhì-gá. ¹³ Te cuèi ní cuu-ndo ñáyiu ñá túú tnahá tnúhu ndìhì Yá Ndiǒxí ní cùu, dico vitna ní tnahá tnúhu-ndo ndìhì-gá chí cùu ìⁿnuu-ndo ndìhì Xítóhó Jesucrìstú, cuèndá sá ñí sati níñí-gǎ te ní xíhí-gá te xǎⁿ ducaⁿ tnàhá tnúhu-ndo ndìhì Yá Ndiǒxí vitna. ¹⁴ Te Xítóhó Jesucrìstú ní quide-gá sá nchóó ío váha cuu iní-ó cùndecu-o, te ñu-ni-gá ní quide cuèndá sá vǎ dáquèe tíhú ñáhá ñáyiu isràél xii ñáyiu ñá túú cùu ñáyiu isràél, te ducaⁿ ìⁿ-ná cuú-yu cundecú-yu. ¹⁵ Te sá ñí xíhí Xítóhó Jesucrìstú, xǎⁿ ñá túú-gǎ cùnùu nchaa tnúhu sá sánú ìchi ñaha xii ñáyiu nàcuáa cadá-yu cundecú-yu ni cùu. Te ducaⁿ ñí xíhí Xítóhó Jesucrìstú cuèndá sá cuè ñáyiu isràél ndìhì cue ñáyiu ñá túú cùu ñáyiu isràél

ɛ̃ⁿ-nǎ cuú-yu cundecú-yu ichi-gá, te ducaⁿ te vá dáquèe tihú tnáhá-gǎ-yu, te ío váha cundecu ndihì tnáhá-yu. ¹⁶ Te ducaⁿ nǐ quide Xítohó Jesucristú ní xihí-gá núú cùrúxí cuendá sá cue ñáyiú cùu ñáyiú isràél ndihì cue ñáyiú ñá túú cùu ñáyiú isràél vá dáquèe tihú tnáhá-gǎ-yu. Te ducaⁿ nǐ xihí-gá cuendá ɛ̃ⁿ-nǎ cuú-yu tnahá tnúhu-yu ndihì Yá Ndiõxí nàcuáa cuu váha iní ñáhá-gǎ xií-yu.

¹⁷ Te cuèi cùu-ndo ñáyiú ñá túú tnàhí xìní ndáá cuendá Yá Ndiõxí ní cùu, dico Xítohó Jesucristú ní quixi-gá ñuyíú-a ní cáháⁿ-gá tnúhu váha nàcuáa ío váha cuu iní-ndó cùndecu-ndo ndihì Yá Ndiõxí. Te ðiu-ni ducaⁿ nǐ quide-gá sá cúú-xí ncháa ñáyiú sa xìní cuendá Yá Ndiõxí, ðiu-ni ñáyiú isràél. ¹⁸ Te cuèi cùu-o ñáyiú isràél àdi ñá túú cùu-o dico ðiu-ni mee Xítohó Jesucristú ní quide-gá sá ncháá-ó tnáhá tnúhu-o ndihì Dútú Ndiõxí Yaá cúú Tǎtá-ó. Te ducaⁿ nǐ tnahá tnúhu-o ndihì Yá Ndiõxí chi ní ngúndecu ndihì-o Espiritú-gá. ¹⁹ Te nchòhó ñáyiú ñá túú cùu ñáyiú isràél ní cuu-ndo ñáyiú ñá túú tnáhá tnúhu ndihì Yá Ndiõxí ní cùu, dico vitna chi ɛ̃ⁿ-nǎ ní cuu-ndo ndihì nchaa dava-gá ñáyiú cùu cuendá-gá chi cùu-ndo déhe-gá. ²⁰ Te cada iní-ó sǎ cuè téé ní táúchíúⁿ Xítohó Jesucristú cáháⁿ tnúhu-gá, ndihì cue téé ní xóo cáháⁿ tnúhu Yá Ndiõxí ndéé sanaha cùu-güedé ðàtná cimièntú ɛ̃ⁿ vehe, te nchòhó cúú-ndó ðàtná ndóho sá sàá vehe-áⁿ, te cada tucu iní-ó sǎ Xítohó Jesucristú cúú-gǎ ɛ̃ⁿ yúú cúnùu cuu cimièntú vehe-áⁿ. ²¹ Te ducaⁿ ïo váha cùu ɛ̃ⁿnuu nchaa ndóho-áⁿ ndihì yúú cúnùu-áⁿ, te ducaⁿ tucu ío váha ta quèe tnàha nchaa ndóho-áⁿ cuásaá. Te xiǎⁿ cada iní-ó sǎ cúú-xí vèhe Yá Ndiõxí, vehe sá ïo ní cuu íí. Te ducaⁿ sǎtnahá-xi

cùu nchaa ñáyiu ndècu ichi Xítóhó Jesucristú chi ní tnahá tnúhu-yu ndihí-gá, te ìíⁿ nduu ìíⁿ nduu ta cùu vii cuu váha-gá-yu núú Yă Ndiöxí cuáháⁿ.
 22 Te tnahá nchòhó ducaⁿ sãtnahá-xi cùu-ndo chi ní ngúndecu ndihí-ndo Xítóhó Jesucristú, te ducaⁿ ta cùu vii cuu váha tucu-ndo núú Yă Ndiöxí cuáháⁿ, te cùu-ndo datná vehe Yá Ndiöxí chi ndècu ndihí-ndo Espíritú-gá.

3

Té Păblú yíhí dǐquí-dě cáháⁿ-dé tnúhu Xítóhó Jesucristú núú ñáyiu ñá túú cùu ñáyiu isràél

1 Te yúhú té Păblú yíhí-í vecaá sá cuendá sá cáháⁿ-í tnúhu Xítóhó Jesucristú núú nchòhó ñáyiu ñá túú cùu ñáyiu isràél, núu xǎⁿ dǐu cuendá-gá duha yíhí-í vecaá vitna. 2 Te nchòhó sa nàha-ndo sá Yă Ndiöxí ní cundàhú iní ñáhá-gă xii-í, te ní cachí-gá sá yúhú quihí dǐquí-í cáháⁿ-í tnúhu Xítóhó Jesucristú núú-ndó, te cuendá sá cáháⁿ-í tnúhu-gá núú-ndó te cuu-xi sá vǎha sá cúú-xí-ndó. 3 Te yúhú sa ní cachí tnúhu-í xii-ndo lùha nacuáa ndùu tnúhu ndùu yuhu ní cuu, sá ní cachí tnúhu Yá Ndiöxí xii-í. 4 Te òré dàcuaha-ndo tnúhu ndùu yuhu-áⁿ ní cùu te quiní-ndó sǎ yúhú tècú tnùní-í nàcuáa ndùu tnúhu-áⁿ, te tnúhu-áⁿ cáháⁿ-xi cuendá Xítóhó Jesucristú. 5 Te tnúhu-áⁿ cúú-xí tnúhu sá vǎ yǒ tnahí xini ní cùu, dico cue tée ní táuchíúⁿ Xítóhó Jesucristú cáháⁿ tnúhu-gá, ndihí cue tée cáháⁿ nàcuáa dàcahu iní ñáhá Yă Ndiöxí ní níhí-güedě tnúhu ndùu yuhu-áⁿ, chi Espíritú Yă Ndiöxí ní xáhaⁿ-xi xì-güedé. 6 Te duha cáháⁿ tnúhu ndùu yuhu-áⁿ ní cùu: “Cuěi ñáyiu ñá túú cùu ñáyiu isràél te cuěi

ñáyiú cùu ñáyiú isràél dico ìⁿ-ni ndùu táhũ-yu sá vâha núú Yă Ndiöxí, te núu na quindáá iní-yu tnúhu sá càháⁿ nàcuáa naníhí tàhú-yu, te ìⁿ-nă cúŷ-yu cundecú-yu, te ducaⁿ ìⁿ-ni cada vâha ñaha Yă Ndiöxí xií-yu te núu na cùndecu ndihí-yu Xítóhó Jesucrístú”, duha ndùu tnúhu ndùu yuhu-áⁿ ní cùu.

7 Te Yă Ndiöxí ní cundàhú iní ñáhá-gă xii-í ní taxi-gá chùⁿ quide-í càháⁿ-í tnúhu-gá, te mee-gă quidé-gă sá yũhú ndacu-í càháⁿ-í tnúhu-gá. 8 Te nchaa ñáyiú cùu cuendá Yă Ndiöxí cúŷ-yu ñáyiú ío-gá cúnùu cadá-yu chùⁿ-gá dàcúxí yũhú, te cuèi ducaⁿ dico Yă Ndiöxí ní cundàhú iní ñáhá-gă xii-í ní taxi-gá chùⁿ quide-í càháⁿ-í tnúhu-gá núu cuè ñáyiú ñá túú cùu ñáyiú isràél. Te tnúhu-gá-áⁿ càháⁿ-xi sá sũní ïo vâha cada ñaha Xítóhó Jesucrístú xii-o. 9 Te ducaⁿ ñă cachí Yă Ndiöxí sá càháⁿ-í tnúhu-gá cuendá danèhé-í nchaa ñáyiú. Te sá dánèhé-í-yu-áⁿ cúú-xí tnũhu ndùu yuhu sá ñă sani iní-gá ndéé sanaha nàcuáa cada vâha-gá cue ñáyiú. Te ndéé dàvá-áⁿ ñă quesaha ndùu yuhu tnúhu-áⁿ ní cùu. Te dũ-ni-gá cúú-gă Yaá ní cadúha nchaandi túhú sá ío. 10 Te ducaⁿ ndùu yuhu tnúhu-áⁿ ní cùu cuendá sá ncháá espíritú cúnùu ndecu andũu quiní-xi vitna nàcuáa quide nchaa ñáyiú ní tuha ñaha xii Yă Ndiöxí cuendá ducaⁿ cùtnuní iní-xi sá ïo vâha cùtnuní iní-gá nàcuáa cada-gá. 11 Te Yă Ndiöxí ní sani iní-gá ndéé sanaha nàcuáa ní cuiní-gá cada Xítóhó Jesucrístú, te ní sáá nduu ñă quide Xítóhó Jesucrístú nàcuáa ní cuiní Yă Ndiöxí cada-gá. 12 Te vitna cùyii-o càháⁿ ndihí-o Yă Ndiöxí cuendá sá ndécú ndihí-o Xítóhó Jesucrístú, te sàndáá iní-ó-gă. 13 Te núu xiăⁿ càháⁿ-í dóho-ndo

să cuëi duha ndòho-í vitna dico vá ná tǔhú iní-ndó cànchicúⁿ nihnu-ndo ìchi Xítóhó Jesucristú. Te sá dúhá ndòho-í te cùu-xi sá vǎha sá cúu-xi-ndó, chi cuu-ndo ñǎyiu cùu cahnu núú Yǎ Ndiǒxí.

Xítóhó Jesucristú ío cùu iní ñǎhá-gǎ xii-o

¹⁴ Te sá cuëndá nchaa sá ñǎ sani iní Dútú Ndiǒxí quidé-gǎ xiǎⁿ yúhú ngüñí xítí-í núú-gǎ cǎháⁿ ndìhi-í-gǎ, te ñiu-ni-gǎ cúu Yáá cúu Tǎtá Xítóhó Jesucristú. ¹⁵ Te mee Yǎ Ndiǒxí ní cachí-gǎ sá ncháá espíritú ndécú àndiu cunduu-xi datná ní cachí méé-gǎ cunduu-xi. Te ní cachí tucu-gǎ sá nchóó cùu-o ñǎyiu, te cunduu-o dàtná cuiní méé-gǎ cunduu-o. ¹⁶ Te xicáⁿ táhù-í núú Dütú Ndiǒxí sá Espíritú-gǎ ná cádá nacuáa cuita níhí ndéé-gǎ-ndó quǎhíⁿ cundecu-ndo ìchi-gǎ, te ducaⁿ xicáⁿ táhù-í núú-gǎ cada Espíritú-gǎ chi ío cǎhnu cuu-gǎ. ¹⁷ Te xicáⁿ táhú tucu-í núú Yǎ Ndiǒxí sá Xítóhó Jesucristú ná cùndecu ndìhi ñaha-ni-gǎ xii-ndo chi sàndáá iní-ndó-gǎ, te ducaⁿ te vá dáñá ndéé-ndó ío cuu iní tnáhá-ndó. ¹⁸ Te xicáⁿ táhú tucu-í núú Yǎ Ndiǒxí cuëndá-ndó ndìhi cuendá dava-gǎ ñáyiu cùu cuendá-gǎ, cuëndá sá cútnùní iní-ndó sǎ sǔúní cùu iní ñǎhá Xítóhó Jesucristú xii-o. ¹⁹ Te duha xicáⁿ táhù-í núú Yǎ Ndiǒxí chi cuiní-í sá ncháá-ndó tēcú tnùní-ndó sǎ ío cùu iní ñǎhá Xítóhó Jesucristú xii-o cuëi vá ndácú cǎva-o quini-ó nacuáa cùu iní ñǎhá-gǎ xii-o. Te xicáⁿ táhú tucu-í núú Yǎ Ndiǒxí sá ío na cùndecu ndìhi ñaha-gǎ xii-ndo, te ducaⁿ cànchicúⁿ nihnu-ndo càda-ndo nchaa nacuáa quide mee-gǎ.

²⁰ Te Yá Ndiǒxí ío-gǎ vǎi sá ndácú-gǎ táxi-gǎ dàcúúxí sǎ xicáⁿ-ó nǔú-gǎ, te cuëi ndéé nchaa sá ñǎ túú sàni iní-ó níhí-ó te tàxi-gǎ, te ducaⁿ chi mee-gǎ

ndécú ndìhi ñaha-gá xii-o, te ndàcu-gá quidé-gă nándi sá vâha sá cúú-xí-ó. ²¹ Te vitna nchaa nchoo ñăyiu ndècu ichi Xítóhó Jesucrìstú chí ná càchí-ó sã ïo càhnu cuu Yá Ndiǒxí, te ducaⁿ-ni cãháⁿ-ó sã ïo càhnu cuu-gá ni caa ni quíhíⁿ chi ndècu ndìhi-o Xítóhó Jesucrìstú. Te ducaⁿ na cùnduu.

4

Espíritú Yă Ndiǒxí quidé-xí cùu ìⁿnuu-o ndecu-o

¹ Te yúhú té Păblú yíhí-í vecaá sá cuëndá Xítóhó Jesucrìstú, te cãháⁿ ndàhú-í núú-ndó sã cádá vâha-ndo cùndecu-ndo datná tàú-xi cada cue ñăyiu ní cãháⁿ Yă Ndiǒxí cundecu ndìhi-gá. Te nchòhó tnàhá-ndó cùu-ndo ñăyiu ní cãháⁿ ñáhá Yă Ndiǒxí cundecu ndìhi-gá. ² Te vá cádá càhnu-ndo mee-ndo, cunduu váha iní-ndó, cunduu càhnu iní-ndó, te cuu iní tnáhá-ndó nàcuáa ducaⁿ cùndee iní-ndó nùu ná cúú sã cúmăní nùú tnáhá-ndó. ³ Te ïo nducu ndèe-ndo cuu ìⁿnuu-ndo cundecu-ndo, chi Espíritú Yă Ndiǒxí chindee ñàha-xi xii-ndo, te ducaⁿ ïo váha cuu iní-ndó cùndecu-ndo chi cùu ìⁿnuu-ndo. ⁴ Te nchoo ñăyiu ndècu ichi Xítóhó Jesucrìstú ìⁿ-ni cùu-o, te ducaⁿ ìⁿ-ni Espíritú Yă Ndiǒxí ndécú, te ðiu-ni ducaⁿ ìⁿ-ni tnúhu ndee ìní ní ngúndecu ndìhi-o cùtnàhá ní cãháⁿ ñáhá Yă Ndiǒxí xii-o. ⁵ Te ìⁿ-ni Xítóhó Jesucrìstú ndécú tàxi tnuní ñáhá-gă xii-o, te ìⁿ-ni cùu-o sandáá ìní-ó tnúhu-gá, te ìⁿ-ni ñă sandute-o. ⁶ Te ìⁿ-ni Dütú Ndiǒxí cúú Yàá cúú Tătá-ó nchàa-o, te ðiu-gá cúnùu-gá yíndàha ñaha-gá xii-o nchàa-o. Te Yá Ndiǒxí dácàháⁿ-gá ìní-ó quide-o chiuⁿ-gá, te ducaⁿ ndècu ndìhi ñaha-gá xii-o nchàa-o.

7 Te nchoo ndì dííⁿ ndì dííⁿ chìndee ñaha Yá Ndiöxí xii-o quède-o nacuáa ndùu chiuⁿ ní cachí Xítohó Jesucrístú cada-o. 8 Te quèè ndáá-xi nàcuáa càháⁿ-xi núú tütú Yá Ndiöxí núú càchí-xi:

Xítohó Jesucrístú cuándaa-gá andiu te ío cùnuu-gá, chi nchaa cue espíritú cúú ùhú iní ñáhá xì-gá ñá túú ní ndàcu-xi naá ndihì ñaha-xi xì-gá, te mee-gã ní cachí-gá nàcuáa ndùu chiuⁿ nduu táhú ìⁿ ìⁿ ñáyiú cadá-yu.

Duha càchí-xi núú tütú-gá.

9 Te sá dúcáⁿ càháⁿ-xi sá cuándaa-gá andiu xiáⁿ cútnùní iní-ó sã ñí cuuⁿ-gá ñuyíú-a. 10 Te Xítohó Jesucrístú ní cuuⁿ-gá ñuyíú-a, te diu-ni-gá cuándaa-gá andiu cuendá ío cunuu-gã taxi tnùní-gá nchaandi túhú sá ío. 11 Te ní dácãhñu-gá cue téé xinu cuechi núú-gã ìⁿ ìⁿ núú chiuⁿ cada-güedé. Te ní cachí-gá sá dâva-güedé cáháⁿ-güedé tnúhu-gá, te dava-güedé ní cachí-gá sá cãháⁿ-güedé nàcuáa dàcahu iní ñáhá Yá Ndiöxí xii-güedé. Te dava-güedé ní cachí-gá sá cúú-güedé cue téé datècú tnúhu cue ñáyiú nàcuáa cadá-yu naníhí tàhú-yu. Te dava-güedé ní cachí-gá sá cúú-güedé cue téé quindaha ñaha xii ñáyiú dacuàha ñaha-güedé xií-yu tnúhu-gá. 12 Te ducaⁿ ñí cachí-gá cada cue téé-áⁿ cuendá canu ichi-güedé cue ñáyiú cùu cuendá Yá Ndiöxí cuendá ducaⁿ ñáyiú-áⁿ ñihí-yu nàcuáa cadá-yu chiuⁿ-gá, te ducaⁿ cuíta níhí ndéé-gã-yu cundecú-yu ichi Xítohó Jesucrístú. 13 Te ducaⁿ ñí cachí Xítohó Jesucrístú cunduu ndéé sáá nduu cùu ìⁿnuu-o quindáá iní-ó tnúhu-gá, te ducaⁿ cùu ìⁿnuu-o tecú tnùní-ó nàcuáa ndùu cuendá-gá chi diu-gá cúú-gã Déhe Yá Ndiöxí, te cuu-o ñáyiú ío quède ndáá dàtná quidé mèè Xítohó Jesucrístú. Te ducaⁿ te ñá túú tnàhí-gá ná cùmání-ó

núú Yă Ndiöxí. ¹⁴ Te ducaⁿ te vá cúú-gă-ó dàtná cue landú vátá cútnùní váha-gá iní-xí, te ni vă cádá-gă-ó dàtná quidé ndùte lamár, chi ndute-áⁿ òré quéné tächí te cuáháⁿ-xi duha cuáháⁿ-xi dàcáⁿ, te ducaⁿ chi vá quìndáá-gá iní-ó tnùhu càháⁿ nchaa ñáyiú dándahú ñáhá xì-o, chi ñáyiú-áⁿ ïo váha xitó-yu nàcuáa dándahú ñáhă-yu xii-o chi càchí-yu sá càháⁿ-yu tnúhu Yá Ndiöxí dico ñá ndáá. ¹⁵ Te nchoo ïo cuu iní tnáhá-ó, te vá dándahú tnáhá-ó, chi càháⁿ-ó mèe-ni sá ndáá. Te xìni ñuhu-xi sá ìⁿ nduu ìⁿ nduu cuita cada ndáá-gá-ó quìhíⁿ dàtná quidé ndáá méé-gă, te ðiú-ni-gá cúú-gă Yaá cúnúu cuu díhna tàxi tnuní ñáhá-gă xii-o. ¹⁶ Te ðiú-ni Xítóhó Jesucrìstú quidé ñàha-gá xii nchaa nchoo ñáyiú ndècu ichi-gá dàtná yìquì cùñú méé-gă, chi ìⁿ yìquì cùñú ío váha ní quée tnàha ìⁿ ìⁿ xichi, te ducaⁿ yìhì túchi yìquì cùñú-ăⁿ yótnì-xi nchaa nacuáa ní quée tnàha. Te ducaⁿ sätnahá-xi cùu nchoo chi ìⁿ-ni cùu-o ndecu-o ichi Xítóhó Jesucrìstú táxí tnùnì ñáhá-gă xii-o. Te núu nchoo quide-o nchaa nacuáa tàú-xi cunduu te cùu iní tnáhá-ó, te ducaⁿ ta ñihí ndéé-gă-ó cuáháⁿ ndécú-ó ìchi-gá.

Vá cádá-gă-ó dàtná ní xóo cada-o cùtnàhá ní xìndecu-o ìchi cuehé ichi duha

¹⁷ Te vitna yúhú càháⁿ-í dóho-ndo quide-í núú Xítóhó Jesucrìstú sá vă cùndècu-gá-ndó dàtná xìndecu ñáyiú ñá túú sàndáá iní ñáhá xì Yá Ndiöxí, chi nchaa ñáyiú-áⁿ ñà túú vèdana nàndìhì nchaa sá sání iní-yu. ¹⁸ Te ni ñà túú vèdana cùtnunì iní-yu nàcuáa ndùu tnúhu ndáá tnúhu Yá Ndiöxí. Te ñáyiú-áⁿ ñà túú ndùu táhŭ-yu cundecú-yu nàcuáa cuìní Yă Ndiöxí, chi ñá túú vèdana tècú

tnùnì-yu te ducaⁿ chi ío sàá iní-yu. ¹⁹ Te ñá túú tnàhí-gá ná sání iní-yu ndècú-yu ichi cuèhé ichi duha, te ío cùdíí iní-yu ndècú-yu ichi díí iní, te ñá díú-ní xǎⁿ chi nándi-gá nchaa sá cuèhé sá dúhá quidè-yu ndècú-yu. ²⁰ Dico tnúhu Xítóhó Jesucristú sá ñí sándáá iní-ndó chi ñá túú dùcaⁿ sanu ichi ñaha-xi xii-ndo cada-ndo. ²¹ Te nchòhó ní cutnùnì iní-ndó nàcuáa ndùu cuendá Xítóhó Jesucristú, te dàcuaha-ndo tnúhu ndáá ñu-ni tnúhu-gá nàcuáa ndècu-ndo ichi-gá. ²² Te vitna vá cání-gă iní-ndó càda-ndo datná ní xóo cada-ndo cǔtnàhá ní xíndecu-ndo ìchi cuehé ichi duha, chi núu nchaa-ni sá cuèhé sá dúhá-ǎⁿ ná cùhuⁿ-ni iní-ndó càda-ndo, te uuⁿ-gá uuⁿ-gá cuita dacuíta nihnu ñaha-xi xii-ndo quíhíⁿ, chi núu nchaa-ni sá cuèhé sá dúhá-ǎⁿ ná cùhuⁿ-ni iní-ndó te dàtìcá nuu ñaha-xi xii-ndo. ²³ Te nchòhó, xìni ñuhu-xi sá vǎ dúcáⁿ-gă caní iní-ndó càda-ndo te tàú-ndó ndùu-ndo datná ñⁿ ñáyiú ní cacu túu saa. ²⁴ Te nduu iní-ndó dàtná cuìní mée Yǎ Ndiǒxí cunduu, chi nduu-xi nàcuáa càa iní mée-gă, te ducaⁿ te cuu-ndo ñǎyiú ío váha cada ndáá, te cuu ndisa-ndo ñǎyiú ñá túú tnàhí ná cumání cundecu núú-gă.

²⁵ Te cuendá xǎⁿ núu càháⁿ-í dóho-ndo sǎ nchòhó vá dàcuàndehnde-gá-ndó dàtná ní xóo cada-ndo, te mee-nǎ sá ndáá cáháⁿ ndihí tnàha-ndo, chi ñⁿ-ni cùu-o ndecu-o ichi Xítóhó Jesucristú.

²⁶ Te núu cùdéeⁿ-ndó te cada cuendá-ndó sǎ vǎ cadá-ndó ñⁿ cuéchi sá dúcáⁿ cùdéeⁿ-ndó, te vá dúcáⁿ-ní cùhuⁿ iní-ndó tnúhu sàtú iní-áⁿ. ²⁷ Te vá dáñá-ndó mée-ndo dandahú ñáhá sàcuíhná xii-ndo.

²⁸ Te núu dava-ndo cùu-ndo ñadúhú te vá dúcáⁿ-gă cada-ndo, chi nducu-nǎ-ndó ñⁿ

chiuⁿ váha cada-ndo nàcuáa ducaⁿ ñhí-ndó sã chindèe-ndo cue ñáyiú ndàhú ñáyiú ñá túú ñá ndécú ndìhi.

²⁹ Te vá càháⁿ-gá-ndó ñi ñⁿ tnúhu cuèhé, chi mee-ñá tnúhu vii tnúhu váha càháⁿ-ndó nàcuáa ducaⁿ ngũnu ichi cue ñáyiú ndèdóho ñaha xii-ndo, te núu ducaⁿ na càda-ndo te cuu-xi sá vãha sá cúu-xi ñáyiú ducaⁿ ndèdóho ñaha xii-ndo-ãⁿ.

³⁰ Te vá cádá-gã-ndó ñi ñⁿ sá ñà túú tàú-ndó càda-ndo cuendá sá vã dándìhú-ndó ñi Espiritú Yã Ndiõxí, chi ñi Espiritú-gá ndécú ndìhi-ndo, te xíãⁿ cútnùní ñi-ndó sã sàá nduu nàcuaca ñaha-gá xii-ndo cùndecu-ndo ndìhi-gá ñi caa ñi quíhíⁿ.

³¹ Te vá dásatú-gá-ndó ñi tnàha ñáyiú-ndo, te ñi vã cúhúⁿ ñi-ndó tnúhu sàtú ñi, te ñi vã cúdeéⁿ-gã-ndó, te cuèi núú chítú núú tàcá vá càháⁿ cana-ndo cùcuèhé-ndó tnàha ñáyiú-ndo, te ñi vã cuátnùhu-ndo tnàha ñáyiú-ndo, te ñi vã cáni cuèhé cani duha ñi-ndó cuendá tnàha ñáyiú-ndo.

³² Te cundàhú ñi tnáhá-ndó, te cada tnàha-ndo sá vãha, te cada càhnu ñi tnáhá-ndó núu ná cúú sã cúmãní núú tnáhá-ndó dàtná ñi quide Yã Ndiõxí ñi quide càhnu ñi-gá nchaa yíçá cuèchi-ndo sã cuendá Xítóhó Jesucrìstú.

5

Nàcuáa tàú-xi cundecu nchaa ñáyiú cùu déhe Yã Ndiõxí

¹ Te nchòhó cúú-ndó ñáyiú ío cùu ñi ñáhá Yã Ndiõxí, te ñi déhe-gá cúú-ndó núu xíãⁿ xíni ñùhu-xi canchicúⁿ ñi-ndo càda-ndo datná quidé mèe-gá. ² Te ío cuu ñi tnáhá-ndó cùndecu-ndo datná cúú ñi ñáhá Xítóhó Jesucrìstú

xii-ndo, chi ñu-gá ní cachí-gá sá cùú-gá cuendá nchaa cuéchi-o te ní xíhí-gá, te sá dúcáⁿ ñí xíhí-gá te ní cuu-gá òàtná ñⁿ táhú sá cùú-xí Yă Ndiöxí, te ío váha ní cuu iní Yă Ndiöxí sá dúcáⁿ ñí quide-gá.

³ Te sá cuendá sá nchòhó cùú-ndó ñăyiu cùu cuendá Yă Ndiöxí ñúu xíáⁿ nchaa nchòhó cue téé vá càháⁿ ndihí-ndo ñăyiu ñíhí te núu ñá díú ñàdihí-ndó cùú-yu, te ducaⁿ-ni nchàa nchòhó cue ñăyiu ñíhí tucu vá càháⁿ ndihí-ndo cuè téé te núu ñá díú yí-ndo cuu-güedé, te ni vă cání tnàhí iní-ndó cùndecu-ndo ichi ñí iní, te ni vă xíhó-ndó ñí ñⁿ sá ndécú ndihí tnaha ñăyiu-ndo, te ni ñⁿ nchaa xíáⁿ vá cání iní-ndó càda-ndo, te ni vă cécú nèhe-ndo. ⁴ Te ni vă càháⁿ-ndó ñⁿ tnúhu sá ni vă cùú cùndedóho ñăyiu, te ni vă càháⁿ-ndó ñⁿ tnúhu cùtexínu, te ni òava-gá nchaa tnúhu sá ñà túú vèdana nàndíhi vá càháⁿ-ndó, chi nchaa tnúhu-áⁿ ñà túú tàú-xi càháⁿ-ndó, te xini ñuhu-xi sá vâha-gá sá ndàcáⁿ táhú-ndó ñúú Yă Ndiöxí cuendá nchaa sá vâha quide-gá. ⁵ Te nchòhó sa xini ndáá-ndó sá ncháá cuè téé càháⁿ ndihí ñăyiu ñíhí te ñá díú ñàdihí-güedé cùú-yu, ndihí cue ñăyiu ñíhí càháⁿ ndihí cue téé te ñá díú yí-yu cùu-güedé, nchaa ñăyiu-áⁿ vă ndúú tãhũ-yu cundecú-yu núú ndécú Yă Ndiöxí ndihí Xítóhó Jesucristú táxí tnùnigá. Te ni cuè ñăyiu xíndecu ichi ñí iní, te ni cuè ñăyiu xího nchaa sá ndécú ndihí tnaha ñăyiu-xi vá ndúú tãhũ-yu cundecú-yu ndihí-gá núú ndécú-gã táxí tnùnigá. Te tnúhu sá càchí-ó xího-o nchaa sá ndécú ndihí tnaha ñăyiu-o, ñⁿ-ni cùu-xi ndihí tnúhu sá càchí ñăyiu quide cahnú-yu nchaa sá càchí-yu cùu ndiöxí te ñá

ndàá sá ndiõxí cúú-xí. ⁶ Te vá quìndáá iní-ndó ñi tnúhu sá ñà túú nàndíhi càháⁿ ñáyiú, chi ñáyiú-áⁿ ïo dandòho ñaha Yá Ndiõxí xií-yu cuèndá nchaa sá cuèhé sá dúhá quidé-yu chi ñá túú sàndáá iní ñáhã-yu xii-gá. ⁷ Núu xiãⁿ càháⁿ-í dóho-ndo sã vã ñihí tnáhá-ndó ndíhi cue ñáyiú-áⁿ.

⁸ Te nchòhó ní cuu-ndo dàtná cue ñáyiú ní xíndecu núú néé chi ní xíndecu-ndo ìchi cuehé ichi duha, dico vitna ní ngúndecu-ndo ìchi Xítohó Jesucristú, te ñá túú-gã ndécú-ndó núú néé dàtná ní xíndecu-ndo ni cùu. Te vitna cada-ndo nchàa nacuaá tàú-xi cunduu chi ndècu-ndo ichi-gá. ⁹ Te sá cuèndá sá ndécú-ndó ìchi-gá núu xiãⁿ cúú-ndó ñáyiú váha, te quide ndáá-ndó ndècu-ndo, te ñá túú dàcuandehnde-ndo chi càháⁿ-ndó mèe-ni sá ndáá. ¹⁰ Te ío váha cada cuèndá-ndó nchàa sá cúú vãha iní Xítohó Jesucristú, te xiãⁿ cada-ndo. ¹¹ Te vá cãncíçúⁿ nihnu-ndo tnáhá-ndó càda-ndo datná quidé cuè ñáyiú ndècu ichi cuehé ichi duha, chi nchòhó tàú-ndó cãháⁿ-ndó dôho nchaa ñáyiú ducaⁿ ndècu ichi cuehé ichi duha-áⁿ cuèndá nchaa sá quidè-yu. ¹² Te cucahaⁿ núú-ndó vã càháⁿ-ndó cuèndá ni ñi sá cuèhé sá dúhá quide dayuhu nchaa ñáyiú-áⁿ. ¹³ Dico òré dándixi túú tnúhu Yá Ndiõxí iní-yu nàcuáa quidè-yu te cùtnuní iní-yu sá ñã túú quide váha-yu, te ducaⁿ ndíxi cuéchi iní-yu cuèndá nchaa sá cuèhé sá dúhá quidè-yu. ¹⁴ Te núú tütú Yá Ndiõxí càchí-xi:

Nchòhó cúú-ndó dàtná ñáyiú xidí, te vitna ndiquíú
 ìní-ndó,
 te cùu tucu-ndo datná ñáyiú ní xíhí, te vitna
 ndoto-ndo,

te Xítohó Jesucristú chindee ñàha-gá xii-ndo
nàcuáa vá cùndècu-gá-ndó ìchi cuehé ichi
duha.

Duha càháⁿ-xi núú tütú-gá.

¹⁵ Te ío váha cada cuèndá-ndó nàcuáa cada-ndo
cùndècu-ndo, te vá cádá-ndó dàtná xíquide cue
ñáyiú ñá túú tècú tnùnì, chi cada-ndo dàtná xíquide
ñáyiú ío váha sàá díquí-xi. ¹⁶ Te ìⁿ nduu ìⁿ
nduu canì iní-ndó càda-ndo nchaa nacúaa tàú-xi
cunduu, chí vitna ío cùnuu nchaa sá cuèhé sá
dúhá. ¹⁷ Te cuu-ndo ñáyiú tècú tnùnì cuèndá
ducaⁿ cùtnunì iní-ndó nàcuáa cuìnì Yá Ndiöxí
cada-ndo, te vá cádá-ndó dàtná xíquide cue ñáyiú
ñá túú tnàhí cùtnunì iní-xi nàcuáa cuìnì Yá Ndiöxí
cadá-yu. ¹⁸ Te vá cúú-ndó ñáyiú quihu chí núú
ducaⁿ na càda-ndo te dàcuíta nihnu-ndo mèe-ndo,
te dañà-ndo mèe-ndo sá Espíritú Yá Ndiöxí ná tàxi
tnunì ñáhá-xí xii-ndo. ¹⁹ Te cáháⁿ-ndó nàcuáa-ni
cuáháⁿ ndudú sá ñí xóo cata nchaa cue ñáyiú
ndéé sanaha ñí xóo chiñuhú-yu Yá Ndiöxí. Te
cáháⁿ-ndó nàcuáa cuáháⁿ ndudú sá chíñùhu-ndo Yá
Ndiöxí, te cata-ndo. Te cuèi nchaa dava-gá ndudú
diu-ni ducaⁿ cãháⁿ-ndó te cata-ndo. Te ñí yùhu ñí
iní-ndó càta-ndo nchaa ndudú-áⁿ chiñuhu-ndo Yá
Ndiöxí. ²⁰ Te vá dáñá ndéé-ndó ndàcáⁿ táhú-ndó
núú Tátá-ó Dütú Ndiöxí cuèi ndècu váha-ndo àdi ñá
túú ndècu váha-ndo. Te ducaⁿ càda-ndo chí ndècu
ndìhi-ndo Xítohó Jesucristú.

*Tàú-xi sá quèndáá iní tnáhá cuè ñáyiú ndècu ichi
Xítohó Jesucristú*

²¹ Te nchòhó ñáyiú ndècu ichi Xítohó Jesucristú
tàú-xi sá quèndáá iní tnáhá-ndó, te ducaⁿ càda-ndo
chí nèhe-ndo sá yíñùhu núú Yá Ndiöxí.

22 Te nchaa nchòhó ñáyiú dìhí ndécú yì-xi, xìni ñuhu-xi sá quìndáá iní-ndó yì-ndo datná sàndáá iní-ndó Xìtohó Jesucristú. 23 Chi yì-ndo tàxi tnuní ñáhá-güedě xii-ndo dàtná quidé Xìtohó Jesucristú táxi tnùnì ñáhá-gă xii nchoo cuè ñáyiú ndècu ichi-gá. Te ñiu-gá cúú-gă Yaá ní dácăcu nihnu ñaha xii-o núú ùhú núú ndàhú, te cùu-o datná yiqui cùñú-gá. 24 Te dàtná quidé nchòo ñáyiú ndècu ichi Xìtohó Jesucristú sàndáá iní-ó tñi-o nchaa tnúhu càháⁿ-gá, ducaⁿ tàú-xi cada nchaa nchòhó ñáyiú dìhí quìndáá iní-ndó tñi-ndo nchaa tnúhu càháⁿ yì-ndo.

25 Te tnàhá nchaa nchòhó cue téé tucu tàú-xi sá ío cuu iní-ndó ñàdìhí-ndó dàtná quidé Xìtohó Jesucristú cúú iní ñáhá-gă xii nchaa nchoo ñăyiú ndècu ichi-gá, chi mee-gă ní xíhí-gá sá cuèndá-ó sã cúú iní ñáhá-gă xii-o. 26 Te ducaⁿ ñi quide-gá cuèndá sá ncháá ñăyiú vitna ngündecu ichi-gá cuu yìñùhú-yu núú Yă Ndiöxí, te ducaⁿ ndàda ndoo ndada nine-gá iní-yu sá cuèndá sá quìndáá iní-yu tnúhu Yă Ndiöxí, te cuanduté-yu. 27 Te ducaⁿ ñi quide-gá cuèndá sá ncháá ñăyiú na ngündecu ichi-gá ío váha cundecú-yu núú-gă, te ducaⁿ vă cündècu-gá ni ìⁿ cuéchi-yu núú-gă, te ni ìⁿ-gá sá ñà túú-gă ná cumání-yu núú-gă chi ío cundecu yìñùhú-yu. 28 Te sá dúcáⁿ quide Xìtohó Jesucristú sá cúú-xí cuè ñáyiú ndècu ichi-gá, xíⁿ tàú-xi sá nchòhó cue téé xĩndecu ñàdìhí-xi cuu iní-ndó ñàdìhí-ndó, te coto-ndõ-yu dàtná xító-ndó yiqui cuñú méé-ndó, te cada iní-ndó sã ncháá cuè téé ío cùu iní ñàdìhí-xi cùu iní-güedé méé-güedé chi

ìⁿ-nǎ cúŭ-yu. ²⁹ Te nchoo sà naha-o sá nì ìⁿ ñáyiu ñá túú dàquee tíhŭ-yu yíqui cùñú-yu, chi da uuⁿ-gá chíndèé-yu te xító-yu. Te diu-ni ducaⁿ quide Xítóhó Jesucristú ndihí nchaa ñáyiu ndècu ichi-gá, ³⁰ chi cùu-o datná yíqui cùñú méé-gǎ, te ducaⁿ chi ìⁿ-ni cùu-o ndihí-gá. ³¹ Te tnúhu Yá Ndiöxí cächí-xi: “Sá cuëndá xǎⁿ nŭu nchaa cue téé na nihí ñadihí-xi te d^ìⁿ-ná cada-güedé tǎtá-güedé ndihí nǎná-güedé, te ñadihí-nǎ-güedé cuu cuu ndihí-güedé, te ducaⁿ ìⁿ-ná cuu-güedé ndihí-yu”, duha cächí-xi. ³² Te tnúhu-a cùu-xi ìⁿ tnúhu càhnu vihi, te ducaⁿ sǎ tnàhá-xi cùu Xítóhó Jesucristú ndihí cue ñáyiu ndècu ichi-gá. ³³ Te cǎháⁿ-ni tucu-í dóho nchaa nchòhó cue téé xǐndecu ñadihí-xi sá ïo cuu iní-ndó ñadihí-ndó te coto-ndó-yu dàtná xító-ndó mèe-ndo, te ducaⁿ-ni nchàa nchohó ñáyiu dìhí tucu canehe-ndo sǎ yíñùhu núú yi-ndo.

6

¹ Te nchaa nchòhó cue landú, quíndáá iní-ndó tǎtá-ndó ndihí náná-ndó chi ducaⁿ cuení Yá Ndiöxí cunduu, te diu ducaⁿ tnàhí tàú-xi cada-ndo. ² Te Yá Ndiöxí ní cachí-gá sá cǎnèhe-ndo sá yíñùhu núú tǎtá-ndó ndihí núú nǎná-ndó. Te tnúhu-án cúú-xí tnúhu cùnuu ní cǎháⁿ-gá cada cue ñáyiu cuëndá cada váha ñaha-gǎ xii-yu. ³ Te ní cachí-gá sá nŭu ducaⁿ na càda-ndo te ío váha cundecu-ndo, te ducaⁿ ïo naha cùdí-ndo cùndecu-ndo ñuyíú-a.

⁴ Te nchaa nchòhó cue téé cùu tǎtá, vá dásatú-ndó iní cue déhe-ndo chi canu ichi-ndo-güèxi nacuáa tàú-xi cunduu, te

dacuàha-ndo-güexi nchaa tnúhu váha nàcuáa cuìní Yă Ndiöxí cunduu.

⁵ Te nchaa nchòhó cue ñáyiú xìnu cuechi, quindáá iní-ndó cuè ñáyiú dii chiuⁿ-xi quide-ndo, te canehe-ndo sã yíñùhu núŷ-yu, te ío váha cuu iní-ndó càda-ndo chiuⁿ-yu, te ducaⁿ ñì yuhu ñì iní-ndó càda-ndo. Te cada iní-ndó sã dàtná tnúhu sá chíúⁿ Xìtohó Jesucristú quidé-ndó. ⁶ Te dava ñáyiú xìnu cuechi, mee-ni òré ndéhé ñáyiú dii chiuⁿ-xi quidé-yu ío ndùcu ndeé-yu quide chiuⁿ váha-yu cuendá cuìní-yu cudíú-yu. Dico nchòhó vá dúcáⁿ càda-ndo, chí cuèi ndècu ñáyiú dii chiuⁿ-xi quide-ndo àdi ñá túŷ-yu dico cada chiuⁿ váha-ni-ndo, te cada iní-ndó sã dàtná tnúhu sá chíúⁿ Xìtohó Jesucristú quidé-ndó, te cada-ndo ñì yuhu ñì iní-ndó nàcuáa cuìní Yă Ndiöxí cunduu.

⁷ Te ío váha cuu iní-ndó càda-ndo chiuⁿ-án, chí cada iní-ndó sã dàtná tnúhu sá chíúⁿ Xìtohó Jesucristú quidé-ndó te ñá díú chiuⁿ cue ñáyiú ñuyíú-a. ⁸ Te nchòhó sa cùnuni iní-ndó sã nàcuáa ndùu chiuⁿ váha ní quide-ndo ñì ñì-ndo, te ducaⁿ cunduu sá táxí Xìtohó Jesucristú nduu táhú-ndó cuèi cùu-ndo ñáyiú dàñá queé núú chíúⁿ pàtróóⁿ-xi àdi cuu-ndo ñáyiú ñá túú tnàhí dàñá quee núú chíúⁿ pàtróóⁿ-xi.

⁹ Te nchaa nchòhó ñáyiú xíndecu ndíhi ñáyiú xìnu cuechi, tnàhá-ndó tàú-ndó càda váha-ndo sã cúú-xí cuè ñáyiú xìnu cuechi núú-ndó, te vá cundùu nínu iní-ndó núŷ-yu, te chí cuàha cuendá sá díú-ní Xìtohó Jesucristú Yaá ndécú àndu taxi tnuní ñáhá-gã xii-ndo ndíhí-yu, te sá cúú-xí mèe-gá chí ñì-ni cùu-ndo núú-gã, te ñì-ni càda ñaha-gã xii-ndo.

Yá Ndiöxí chíndè-gá cue ñáyiú ndècu ichi-gá

cuendá sá vǎ ndácú sàcuíhná nàá ndihí ñaha-xi xì-yu

10 Te vitna nchaa nchòhó ñáyiú ndècu ndihí-í ichi Xítohó Jesucrìstú càchí tnúhu-í xii-ndo sǎ ìo nducu-ndo nàcuáa cada-ndo ñhí ndéé-ndó cùu ìn nuu-ndo ndihí Xítohó Jesucrìstú, chi mee-gǎ ìo càhnu cuu-gǎ, te chindee ñaha-gǎ xii-ndo. 11 Te ñu-ni nchaa sá ñi nduu táhú-ndó núú Yǎ Ndiòxí ñu-ni nchaa xiǎⁿ cuhuⁿ ini-ndó, chi xiǎⁿ chindee ñaha-xi xii-ndo ñhí ndéé-ndó cùndecu-ndo cuendá sá vǎ dándàhú ñáhá sàcuíhná xii-ndo. 12 Chi nchoo ñà díú cuè ñáyiú ñuyíú-a nàá ndihí-o, chi ndihí cue espíritú cùndìhí yucu ñávǎha, te ñu-ni nchaa espíritú-áⁿ cùnùu-xi cuéi núú ñnu quìde-xi nchaa sá cuèhé sá dúhá, te ñu-ni-xi cùnùu-xi ñuyíú-a sànu ichi-xi cue ñáyiú quidé-yu nchaa sá cuèhé sá dúhá. 13 Te ìo cuhuⁿ ini-ndó nchaa sá ñi nduu táhú-ndó núú Yǎ Ndiòxí cuendá ducaⁿ ñhí ndéé-ndó cùndecu-ndo, te vǎ ndácú yùcu ñávǎha ná cada ñaha-xi xì-ndo oré cuìní-xi coto ndeé ñáhá-xí. Te sátá ná dàquee tíhú-ndó yùcu ñávǎha te ñhí-ni cunduu-ndo cùndecu-ndo ichi Yǎ Ndiòxí. 14 Te ducaⁿ cùndecu-ni-ndo ichi Yǎ Ndiòxí cada-ndo dàtná xǐquide cue sandàdú, chi cue téé-áⁿ ìo ñhí xǐndáa-güedé. Te cáháⁿ-ndó mèe-ni tnúhu ndáá tnúhu Yǎ Ndiòxí, te cuu-ndo dàtná cue sandàdú cue téé ndàda tii xití-xi òré quíhíⁿ-güedé nàá-güedé. Te ducaⁿ sǎtnahá-xi cuu-ndo te núu na càháⁿ-ndó mèe-ni tnúhu ndáá tnúhu Yǎ Ndiòxí. Te cada ndáá-ndó cùndecu-ndo ichi-gǎ, te cuu-ndo dàtná cue sandàdú cue téé xǐxǐhnu sá yídǎhu ñaha xì-güedé òré nàá-güedé cuendá sá vǎ ñicùehé-güedé. Te ducaⁿ sǎtnahá-xi cuu-ndo te núu na càda ndáá-ndó cùndecu-ndo

ichi-gá. ¹⁵ Te cundecu túha-ndo cǎháⁿ-ndó tnǎhu Xítóhó Jesucristú, tnúhu sá cǎháⁿ nàcuáa cuu váha iní ñáyi cuudécú-yu, te cuu-ndo dàtná cue sandàdú cue téé ndíhu zapátú-xi quíhíⁿ-güedé nàá-güedé. Te ducaⁿ sǎtnahá-xi cuu-ndo te núu na cundecu túha-ndo cǎháⁿ-ndó tnǎhu Xítóhó Jesucristú núú ñáyi. ¹⁶ Te cǎchí tnúhu tucu-í xii-ndo sǎ ïo quindáá iní-ndó Yǎ Ndiǒxí cuendá sá vǎ ndácú sàcuíhná nǎ cada ñaha-xi xii-ndo, te ducaⁿ te cuu-ndo dàtná cue sandàdú cue téé xínehe vítú chínèe-güedé sáquídáhu ñaha-xi xii-güedé cuendá sá vǎ cuicúⁿ-güedé sá nchicúⁿ ñuhú téé ñaha cue téé nàá ndíhi-güedé. Te ducaⁿ sǎtnahá-xi cuu-ndo te núu na quindáá iní-ndó Yǎ Ndiǒxí. ¹⁷ Te ïo cuhuⁿ iní-ndó sǎ ñí naníhí tǎhú-ndó, te cuu-ndo dàtná cue sandàdú cue téé ñúhu mbelú cáxíⁿ. Te ducaⁿ sǎtnahá-xi cuu-ndo te núu na cuhuⁿ iní-ndó sǎ ñí naníhí tǎhú-ndó. Te ïo cuhuⁿ iní-ndó tnǎhu Yǎ Ndiǒxí, chí tnúhu-áⁿ ñí taxi Espíritú-gá ndécú ndíhi-ndo chindee ñaha-xi xii-ndo, te cuu-ndo dàtná cue sandàdú cue téé xínehe machítí cuáháⁿ-güedé nàá-güedé. Te ducaⁿ sǎtnahá-xi cuu-ndo te núu na cuhuⁿ iní-ndó tnǎhu Yǎ Ndiǒxí. ¹⁸ Te vǎ dáñá ndéé-ndó cǎháⁿ ndíhi-ndo Yǎ Ndiǒxí nàcuáa chindee ñaha Espíritú-gá xii-ndo, te cácáⁿ tǎhú-ndó núú-gǎ núu ná cuiní-ndó, te ïo cundecu túha-ndo cǎháⁿ ndíhi-ndo-gǎ, te vǎ nátùhú iní-ndó cǎcáⁿ tǎhú-ndó núú-gǎ cuendá nchaa dava-gá cue ñáyi cuu cuendá-gá. ¹⁹ Te tnàhá cuendá-í cácáⁿ tǎhú-ndó núú Yǎ Ndiǒxí cuendá sá ná chindee ñaha-gá xii-í níhi-í tnúhu cǎháⁿ-í órè cǎháⁿ-í tnúhu-gá, te ducaⁿ vǎ yùhú-í cǎháⁿ-í nàcuáa ndùu tnúhu sá cǎháⁿ nàcuáa naníhí tǎhú-ó núú ñáyi tnúhu sá vǎtá cündèdóho-gá-yu.

²⁰ Te Yá Ndiöxí ní cachí-gá sá yǔhú cuu-í ìíⁿ té cada-í núu-gă cáháⁿ-í tnúhu-gá núu ñăyiu, te ðiu cuendá tnúhu-áⁿ yíhì-í vecaá vitna. Te ío cácaⁿ táhú-ndó núu Yă Ndiöxí cuendá-í cuendá sá yǔhú cuyi-í ñi yùhu ñi iní-í cáháⁿ-í tnúhu-gá núu ñăyiu nàcuáa tàú-xi cunduu.

Tnúhu ndéé núu ñi ndihí-ná

²¹ Te té Tìquicú téé ío cùu iní-í ndécú ndihí-o ichi Xítóhó Jesucristú cúú-dě ìíⁿ téé ío váha quide ndáá xínú cuèchi-dé núu Xítóhó Jesucristú, téé-áⁿ cachí tnúhu-dé xii-ndo nàcuáa cùu ndecu-í ndihí nchaa nàcuáa quide-í cuendá ducaⁿ cùtnuní iní-ndó. ²² Te cuendá xǎⁿ núu cuìní-í tendaha-í-dé quixi-dé núu ndécú-ndó cuendá cachí tnúhu-dé xii-ndo nchaa nacuáa cùu ndecu-ndí iha, te ducaⁿ tàxi-gá-dé tnúhu ndee ìní cundecu ndihí-ndo.

²³ Te xìcáⁿ táhù-í núu Tătá-ó Dǔtú Ndiöxí ndihí núu Xítóhó Jesucristú sá ncháá nchòhó ñăyiu ndècu ndihí-í ichi-gá sá ðiu-gá ná cádá te ío váha cuu iní-ndó cùndecu-ndo, te ducaⁿ ìo cuu iní tnáhá-ndó, te ío quindáá iní-ndó-gă. ²⁴ Te nchòhó ío cùu iní-ndó Xítóhó Jesucristú, te ñá túú dàña ndéé-ndó cùu iní-ndó-gă. Te mee Yă Ndiöxí ío na chindee chitúu ñaha-gă xii-ndo. Te ducaⁿ na cùnduu. Te ío chí cádá ndèe iní-nă vitna.

Tnúhu ní cáháⁿ yă ndiöxí xito cùu uú
New Testament in Mixtec, Peñoles (MX:mil:Mixtec,
Peñoles)

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

872f7754-0986-5ecd-a059-925a708a6939